



Malik Berthelsen
Siumut
/MAANI

Sisimiut Kangerlussuullu akornanni aqqusineq pillugu § 37 naapertorlugu apeqquteqaammut akissut

Asasara Malik Berthelsen.

Sisimiut aamma Kangerlussuup akornanni aqquserniorsinnaaneq pillugu apeqqtinnut qujanaq:

1. Sisimiuniit Kangerlussuarmut aqqusineqalersinnaaneraniq pilersaarut Angallanermut Ataatsimiititaliarsuarmut pivusorsioertuunnginnerarlugu nalilerneqartoq Naalakkersuisunit aamma taama isumaqarfigineqarpa?
2. Sisimiut Kangerlussuullu akornanni aqqusinissaq pivusunngortinneqassagaluarpat takornariaqarnikkut taassumalu kingunerisaanik nunatsinnut aningaasatigut qanoq iluaqutaasinnaassuseqartiginera Naalakkersuisunit misissuiffigineqarnikuua?

1 pillugu.

Aallarniutigalugu oqaatigissavara, maannakkorpiaq Arctic Umiq Line-p saniatigut Assartuussineq pillugu Isumalioqatigiissitap inassuteqaatai suli politikkikkut suliarineqanngimmata. Tassalu Sisimiut aamma Kangerlussuup akornanni aqquserniornissaq pivusorsioertuunersoq suli Naalakkersuisunit isummerfigineqanngilaq.

Assartuussineq pillugu Isumalioqatigiissitap isumaliutissiissutaa ilisimaneqartutut ukioq manna apriliip ulluisa aallaqqaataanni tamanut ammasumik saqqummiunneqarpoq, tamatumalu kingorna saqqummiunneqartut misissorluarnerinut piffissangaatsiaq atorpara, taamatullu Qeqqata Kommuniani aamma Qaasuitsup Kommuniani innuttaasunik ataatsimiititsinernut maannamut marluogallartunut peqataasimallunga.

Oqaatigineqareersutut suliassat arlaat aallartittariaqarnersut aammalu qanoq tulleriarisoqassanersoq pillugu suli aalajangiisoqanngilaq. Tassanili Assartuussineq pillugu Isumalioqatigiissitap inassuteqaatai, misissueqqissaarnernik sukumiisunik tunngaveqartut siunissami tulleriarinissami pingaartinneqassasut ersarippoq.

2 pillugu.

Illit oqaatigisattut Assartuussineq pillugu Isumalioqatigiissitap isumaliutissiissutimini Sisimiut aamma Kangerlussuup akornanni aqquserniornissaq inuiaqatigiit aningaasaqarnerat eqqarsaatigalugu iluanaarutaasinnaanngitsutut isumaqarfigaa. Misissueqqissaarneq taanna – Assartuussineq pillugu Isumalioqatigiissitap misissueqqissaarfigisai allat assigalugit – inuiaqatigiit ineriartornissaannut naatsorsuutigisanik tamarmiusunik tunngaveqarpoq – tassanissaarlu aamma takornariaqarneq ilaatinneqarpoq. Naatsorsuutigisat taakkua isumaliutissiissutit

3. juni 2011

Sagsnr. 2011-050397

Dok. Nr. 646123

Postboks 909

3900 Nuuk

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

kapitaliisa pingajuanni atuarneqarsinnaapput. Taamatuttaaq Isumalioqatigiissitap aqquuserniassamik misissueqqissaarnerani aqquuserniornerup nassatarisaanik takornariaqarnerup annertusisinnaaneranut, taamatullu aqquuserniassap nunap immikkoortuani ineriartormik annertusititsisinnaaneranut periarfissat immikkut ittumik ilanngunneqarput. Sunniutissalli taakku ilanngunneqaraluartut Assartuussineq pillugu Isumalioqatigiissitap suliassaq iluanaaruteqarfiusinnaasutut isumaqarfiginngilaa. Tassalu takornariaqarnermut sunniutissat naatsorsukkanut pigineqareersunut ilanngullugit naatsorsorneqareerput.

1-ip ataani nassuiaatigineqartutut suliassat arlaannulluunniit suli Naalakkersuisut aalajangiussaqaqngillat, taamaattumillu suliassamut immikkut ittumut tassunga misissueqqissaarnissaq pisariaqartinneqarnerseq suli isummerfigineqanngilaa.

Inussiarnersumik inuulluaqqusillunga

Jens B. Frederiksen